

EUSKAL HERRIA KORRIKA



Gorazarre Aita Villasanteri

Euskaltzain frantziskotarrak Arantzazutik euskararen alde egindako lan isila omendu zuen atzo Korrikak

Luis Villasante euskaltzain eta idazle gernikarrari ohore egin zion atzo Korrikak. Ekitaldi xume baina hunkigarria izan zen Arantzazun fraile frantziskotarrak urteetan eta urteetan euskararen alde egindako lan handia eskertzeko. Haren eskuetan egin zituen lekukoak aurtengo Korrikaren lehen metroak.

Jone Larrañaga / Arantzazu

ELEGANTE, ohi ez duen moduan jantzita igo zen oholtza gainera Aita Villasante. Azken urte hauetan guztietan egunero egiten duen bezalaxe, frantziskotarren abitu marroia jarri zuen soinean, baina haren gainetik petoa, Korrikan arineketan egiteko janzten den peto koloreduna. Berak baitzuen Euskal Herrian barrena 2.500 kilometro egingo dituen lekukoa abian jartzeko ardura, eta ongi baino hobeto bete zuen agindutako lana.

Aurrez, baina, Korrikak egindako omenaldi goxoa jaso zuen euskaltzainak. Arantzazuko ez-kilek lau eta erdietako kanpainak jotzearekin batera, hasi zen aurkezlea tranpaldotik gainera igotakoan aurkezpen lanak egiten: Juan Mari Larrarte, AEK-ko Gipuzkoako koordinatzailea; Jean Haritzelhar, euskaltzainburua; Anjel Olalde, aurtengo Korrikako koordinatzailea; eta horien artean, omendua: Luis Villasante.

Sebastian Lizaso eta Andoni Egañak bertsoan euskaltzain txikiaren handitasuna azpimarratu ondoren, Haritzelharrek egin zion gorazarre lehenik kide duenari. «Egin dituzun lanengatik eta hainbat urtez euskararen bultzatzaile izan baitzara», esan zion Villasanteri, hark Arantzazutik egin duen lan isila gogora ekarri nahirik. Omenaldiaren oroigarri, bere lanari gorazarre egiten dioten bertsoz osatutako oroigarria eskaini zion segidan oparitan.



Aita Villasantek ondo merezitako omenaldia jaso zuen atzo Arantzazun. EDURNE KOCH

Ez zen jaso zuen opari bakarra izan, ordea. Euskalduntze Alfabetatze Koordinakundeko (AEK) ordezkarien eskuetatik arrosa

sorta eder-eder bat ere eman zioten frantziskotarrari. Betiko moduan umil jaso zituen guztiak Aita Villasantek, Korrikako le-

kukoa hartu, oholtzatik jaitsi eta korrika hasi aurretik. Oheretza izan zen Korrikaren hasiera.

«Aldarrika ezazue euskarak behar duela bizi»

KORRIKAREN hasiera ekitaldia euskararen aldeko aldarrikapen ekitaldi bihurtu zen. Euskalduntze Alfabetatze Koordinakundeko (AEK) ordezkariak bezala, oholtzaren gainean hitza hartu zuten gainontzekoek ere euskara bultzatu beharra aldarrikatu zuen, baita Jean Haritzelhar Euskaltzaindiko buruak ere.

Hitzordua aprobetxatuta, Euskaltzaindiko kideek Arantzazun egin zuten bilera atzo. Bazkaritan bapo egin ondoren, guztien izenean mintzatu zen Haritzelhar jendetzaren aurrean. Euskararen akademiako buruak Ipar Euskal Herrian euskarak duen egoera ekarri zuen gogora, urteetan eta urteetan euskararen gordeleku izan den harkaizpetik, Arantzazutik. Euskarak ofizialtasunik ez du Iparraldeko hiru probintzietan eta haren ezagutzak beharrez egin du naharmen azken urte hauetan. Egoera hori aldatu eta «egun batez euskaldun izateko parada izaitzeko» mezu bat bidali zien gaurtik hasita Ipar Euskal Herrian korrika ariko diren euskaltzaleei. «2.500 kilometro egingo dituzue Euskal Herrian barrena. Nik nahi dut eman mezu bat: sartuko zarete Iparraldean; eskatzen dautzuet aldarrika ezazuela euskarak behar duela bizi, behar duela iraun eta, hemen bezala han behar duela ofizialtasuna», adierazi zuen.

Hitz horien ostean eman zion ongi etorria euskararen aldeko ibilaldi handiari: «Has dadila Korrika!». Txalo zaparrada artean jaso zuten Arantzazun bildutakoek Euskaltzaindiko lehendakariaren adierazpenak.

Aurtengo ekitaldiko lehen kilometroak Gipuzkoan egin ondoren, gaur sartuko da Korrika Lapurdin. X

ZUNBELTZ
TABERNA

Arrandegia, 12
Tf.: 46 39 27
DONOSTIA

Hosfrinor

Ostalaritzarako Ekipamendu Industrialean espezialistak

Pokopandegi, 8 - IGARA - (Gurelesa / Iparlat-en aurrean) - 20009 Donostia
Tfnoak: 21 21 28 / 21 76 39 - Faxe: 21 96 82

MENDIBURU
ZERBITZU ESTAZIOA

SARIAKI!

Egunero 100 sari ematen dira

MARTUTENEO IBILBIDEA 89
DONOSTIA